



Wir Ferdinand

Von Gottes Gnaden/Römischer/zu Hungern vnd Böham k. König k. Infant in Hispanien/Erzherzog zu Österreich/
Herzog zu Burgundi/Steir/Kerndten/Grain vnd Wirtenberg k. Graf zu Tyrol k. Embieten. Allen vnd jeglichen vnsern Vnderthanen/Gaistlichen
vnd Weltlichen/ So in vnsern fünf Niderösterreichischen Landen/ Zusp Patronatus/ oder Gaistliche Lehen schafften / über Pfarren / Beneficia oder andere
Gaistliche Stifftungen haben/inn was Werden/ Stand oder wessens die sein/ denen diser vnser Bueff fürkumbt/ oder zutreiben gethan wirdet/ niemandt auf-
genommen/ Vnser gnad vnd alles güts. Nach dem wir auß den Gaistlichen Visitation handlungen/ vnd sonst durch ander glaubwürdig anzaigen erinnert
werden/ Das neben andern mangeln vnd gebrechen/ So bey den Gotsheusern/ Pfarren/ vnd Stifftungen erscheinen/ in vnserm Erzherzogthumb Österreich
vnder der Enns/ dergleichen inn den andern vnsern Niderösterreichischen Landen/ an mehr orten/ vil Pfarren vnd Beneficia bey disen beschwärlichen leiffen
vnd zeitten/ nun an zeitlang vaciert/ vnd ledig gestanden/ vnd noch ledig steen sollen. Darauf dann eruolgt/ das die Armen gemaine Vnderthanen an vil or-
ten/ Sonderlich aber auß dem Land vnd Gey/ bey den Pfarren/ des Gotsdienstes/ des hailigen worts Gottes/ vnd irer Seel Recht entrathen/ vnd also nicht one
sondere beschwörung irer gewissen/ vnd ver hinderung irer Seelen hail vnnnd Säligkeit/ one Tauff/ Beichte/ vnd empfangung vnd nneßung der Hochwürdig
Sacramenten/ erbärmlich wie das vich leben vnd Sterben müssen/ Welches alles wir mit beschwärem gemüt verstanden/ vnd derhalben/ vnd sonderlich inn
betrachtung das die sachen so weit gerathen vnd kommen/ das die Gaistliche Ordinari hierinn nottrentige wendung nit wol thun können noch mügen/ Vnd
vns aber als Christlichem König/ vnd Regierendem Herren vnd Landes Fürsten/ inn Grafft vnserer tragenden Ampts zusehen vnd gebühren will/ hierinn der-
massen gebürlich einsehen/ vnd wendung zethun/ damit die Pfarren vnd Gaistliche Stifftungen/ dem Allmechtigen zu lob/ Ehr vnnnd pries/ vnd den Christen
Menschen zu trost vnd hail erhalten/ vnd mit tauglichen vnd geschickten Pfarern vnd Priestern/ so mit verkündung des hailigen worts Gottes/ vnnnd verrich-
tung der Pfarlichen ämpter vnd Seelsorg der Pfarren/ menig/ statlich vnd Christlich vorstehen mügen/ wider ersetzt werden. So beuelhen wir Euch allen/ vnd
Ewer yedem in sonderhait/ mit allem Ernst/ vnd wollen/ Das ir Euch bey verliering Ewerer Collatur/ vnd Lebensgerechtigkeit/ innerhalb zwanyer Monaten
nach Publicierung diser vnser General nächstfolgend/ vnnb geschickte Priester/ so den verfürischen Setten nit anhängig/ noch zügethon/ vnd zu verrichtung der
Seelsorg/ vnd Pfarlicher vnd Priesterlicher ämpter tauglich vnd genüßsam sein/ beverbet/ vnd solch Pfarren vnd gaistliche Beneficia on alles verlengern/ wie
sich gebürt/ verleyhet/ Vnd vns Innerhalb/ oder doch bald nach verscheynung der zwanyer Monaten/ Ob ir vnd Ewer yeder besonder/ mit solcher verleyhung/
vnserm Beuelch gelebt/ oder aber auß was vrsachen oder ver hinderung demselben nit gelebt werden können oder mögen/ vns in schriffte berichtet/ Damit alsdann
durch vns ferner die notdurfft fürgenommen/ vnd gehandelt werden müg. Wir wollen Euch vnd Ewer yedem in sonderhait daneben auch gnediger mai-
nung nit verhalten/ das wir vnsern Commissarien/ so wir neben den Gaistlichen Ordinarius zu der gaistlichen Reformation/ handlung fürgenommen vnd ver-
ordnet/ vnder andern in aufgelegt vnd beuolhen haben/ die Collatores/ so die Pfarren nit verlißen/ sonder die Güter vnd Einkommen selbst eingezogen/ vnnnd zu
irem aignen Nutz verwendet/ oder die Pfarren in ander weg mit Pensionen/ ongewonlicher vnd ongebürlicher Kobath/ oder andern dergleichen sachen beschwärt/
Solcher nuzungen/ Einkommen/ Pensionen oder beschwörungen halben/ auß vnserer verordneten Sindici Clag/ in vnserm Namen für sich zu Citiren vnd zu
eruordern/ vnd darauß gültlich/ oder wa die gültigkeit nit verfenglich sein wolte/ Sich Rechtelicher handlung/ vnd verabschidung zugebrauchen/ doch in allweg
mit vorbehalt dem beschwerten teil der Appellation/ für vnser Niderösterreichische Regierung vnd Camer/ Vnd wouer nun hierauf ir oder yemandt auß Euch/
durch angeregt vnser Commissarien/ auß vnserer Sindici clag Citirt vnd eruordert werden. Beuelhen wir Euch ferner mit ernst/ vnd wollen/ das ir vnd Ewer
yeder auß solch eruordern vor vnsern Commissarien gehorsamlich erscheinet/ vnd der empfangnen vnd eingezognen Nuzungen halben/ von den vacierenden
Pfarren vnd Beneficien gegen ermeltem vnserm Sindico/ vor vnsern Commissarien gültlicher oder Rechtelicher handlung gewartend seyey/ vnd derhalben gebür-
liche Raitung vnd verantwortung thut/ damit alsdann solch Nuzungen der Kirchen/ Pfarhöf/ oder den Pfarriern zu deß statlichen irer vnderhaltung/ dahin
dann die durch den Stifter vermamt/ mit Rath verwendet vnd angelegt werden mögen. Des wollen wir vnns zu Euch allen/ vnd Ewer yedem in sonderhait
genzlich vnd ungezweiflich versehen. Vnd beschicht daran vnser Ernstlicher willen vnd mainung. Geben in vnser vnd des Reichs Stat Augspurg/ den
zwanzigsten tag Marcij/ Nach Christi geburt/ Fünffzehnhundert vnd im Achtvndvierzigsten/ Vnserer Reiche des Römischen im Achtzehenden/ vnd der
andern im zwanzvndzwanzigsten Jaren.

Ferdinand



*Ad mandatum dñi
magistri Joh. Schöner*

*Thomas B.
verantw.*

M. Schöner